



**HOTUBA YA MKURUGENZI MKUU (LATRA) KATIKA UFUNGUZI WA
MKUTANO WA WADAU WA TRENI YA ABIRIA DAR ES SALAAM**

Tarehe: 19 Agosti 2022

Mahala: Ukumbi wa Anatougrou Dar es Salaam

- **Mheshimiwa Mhe. Ng'wilabuzu Ndatwa Ludigija, Mkuu wa Wilaya ya Ilala, na Mgeni Rasmi kwenye Mkutano huu,**
- **Ndugu Wadau Wote wa Huduma za Usafiri wa Reli Tanzania (Abiria, Chama cha Kutetea Abiria-CHAKUA, na Baraza la Walaji wa Huduma za Usafiri Ardhini – LATRA CCC)**
- **Ndugu Viongozi na wafanyakazi wa TRC (mliopo)**
- **Ndugu Viongozi na wafanyakazi wa LATRA (mliopo)**
- **Ndugu Viongozi na wawakilishi wa taasisi mbalimbali za Serikali na Sekta Binafsi (mliopo)**
- **Ndugu Wanahabari,**
- **Kamati ya Maandalizi ya Mkutano huu na Wenyeji wetu**
- **Wageni waalika mabibi na mabwana, Itifaki imezingatiwa**
- **Nawasalimu kwa Jina la Jamhuri ya Tanzania**

Mheshimiwa Mgeni Rasmi, Awali ya yote namshukuru Mwenyezi Mungu kwa kutujaalia uzima, afya na fursa ya kuweza kukutana hapa leo ili kupokea mapendekezo ya mabadiliko ya nauli za usafiri wa treni, kuyajadili, kutoa mapendekezo na kasha kumpa fursa Mdhibiti (LATRA) kufanya tathmini ya mapendekezo hayo kwa kuzingatia taarifa iliyo wasilishwa na maoni ya wadau.

Mheshimiwa Mgeni Rasmi, Pili, natoa shukrani za kipekee kwako kwa kukubali ombi letu na kujumuika nasi katika shughuli hii muhimu ya kupokea maoni ya wadau wa usafiri wa treni ya abiria kutoka Dar es Salaam kwenda vituo vya nje ya Dar es Salaam.

Tunafahamu kwamba unayo majukumu mengi, makubwa na muhimu katika ratiba zako, lakini pia umeweza kutenga muda na kufika hapa ili kutimiza jukumu hili ambalo pia ni la maslahi makubwa kwa Watanzania na Taifa letu kwa ujumla. Hii ni bishara njema kwetu, wadau tuliopo hapa na Watanzania wote.

Mheshimiwa Mgeni Rasmi, naomba pia naomba nitoe shukrani zangu za dhati na za moyoni kwa wadau wetu wote na hasa waliopo hapa kwa kukubali mwaliko wetu na kuhudhuria mkutano huu. Ninatambua kila mmoja wetu ana majukumu mazito ya kiofisi au hata ya binafsi lakini kwa kutambua umuhimu wa mkutano huu wameacha shughuli zao ili kwa pamoja tuweze kushirikiana katika hili.

Mheshimiwa Mgeni Rasmi, LATRA ni Mamlaka ya Udhhibiti Usafiri Ardhini (Tanzania Bara) na majukumu yake makuu ni udhibiti wa huduma katika usafiri kwa njia ya barabara, reli na waya (cable transport). LATRA ilitokana na iliyokuwa SUMATRA, ambayo ilifutwa na kuundwa TASAC na LATRA. Pamoja na Sheria ya LATRA, Tunazingatia pia Sheria ya Leseni (1973) na ya Reli (2017).

Mheshimiwa Mgeni Rasmi, Kwa Mujibu wa Kifungu cha 19 cha Sheria ya LATRA, Sura Na. 413 na Kanuni za Tozo (The Land Transport Regulatory Authority (Tariff) Regulations) za Mwaka 2020, LATRA ina jukumu la kupanga na kufanya mapitio ya tozo (nauli) ya huduma zinazodhibitiwa katika usafiri wa ardhini (barabara, reli na waya).

Mheshimiwa Mgeni Rasmi, ili LATRA iweze kupanga tozo (nauli), mtoa huduma anayedhibitiwa napaswa kuwasilisha maombi kwa LATRA. Baada ya kupokea maombi, LATRA humpa mtoa huduma nafasi ya kuwasilisha mapendekezo yake kwa wadau na pia kuwapa fursa wadau kutoa maoni yao juu ya mapendekezo yatakayowasilishwa. Hivyo, LATRA ilipokea maombi ya TRC ili apewe nafasi ya kuwasilisha kwa wadau na leo ndio tunaanza mchakato huo.

Mheshimiwa Mgeni Rasmi, ili LATRA iweze kupata maoni ya wadau wanaotumia huduma za usafiri wa reli (TRC), tumepanga kufanya mikutano

katika mikoa wakilishi (sample) minne (4) ya Dar es Salaam (19/08/2022), Kigoma (22/08/2022), Mwanza (24/08/2022) na Arusha (29/08/2022). Ili kupata maoni ya wadau wanaotumia huduma za usafiri wa reli (TRC), tumepanga kufanya mikutano katika mikoa wakilishi (sample) minne (4) ya Dar es Salaam (19/08/2022), Kigoma (22/08/2022), Mwanza (24/08/2022) na Arusha (29/08/2022). Mikutano hii inaratibiwa kwa kuwashirikisha Wakuu wa Mikoa na Ofisi za LATRA mikoani. Tayari Kigoma na Mwanza mikutano itafanyika katika kumbi za Ofisi za Wakuu wa Mikoa. Arusha tutawatangazi ukumbi baadae.

Mheshimiwa Mgeni Rasmi, Jukumu tunalolifanya hapa leo hii ni kwa mujibu wa Sheria ya LATRA Na. 3 ya mwaka 2019 (au Sura ya 413) ambayo inaipa Mamlaka dhamana ya kupitia mapendekezo ya nauli yaliyowasilishwa na mtoa huduma (TRC) kwa kuzingatia uwasilishaji wa taarifa, maoni ya wadau na viashiria muhimu vya uchumi. Mamlaka inajukumu la kuchambua taarifa mbalimbali za kiuchumi kabla ya kutangaza nauli rasmi zitakazo tumika.

Mheshimiwa Mgeni Rasmi, baada ya maelezo haya, napenda kukufahamisha kuwa Mkutano wetu wa leo utakuwa na sehemu kuu mbili.

1. tutawapa nafasi TRC kuwasilisha mada yao ambapo watapaswa kuonesha uchambuzi uliowawezesha kufikia mapendekezo ya nauli waliyoyatoa, na

2. tutatoa nafasi kwa wadau kutoa maoni kuhusu kilichowasilishwa na TRC na LATRA itayachukua na kwenda kuyafanyia tathmini.

Mheshimiwa Mgeni Rasmi, katika tathmini ya LATRA, Sheria inataka tuhakikishe kuwa mtoa huduma (TRC) aweze kutoa na kuendelea kutoa huduma kwa ufanisi na walaji (watumiaji wa huduma) – Watanzania, wapate huduma bora za usafiri wanazoweza kuzifikia (affordable) na zenye kuzingatia thamani ya pesa wanazolipa. Aidha, jukumu hilo hilo linalenga kuhakikisha upatikanaji wa huduma bora ambazo ni endelevu kwa upande wa mtoa huduma.

Mheshimiwa Mgeni Rasmi, baada ya kukamilisha zoezi la kupokea maoni ya wadau, Menejimenti ya LATRA itafanya tathmini na kuwasilisha mapendekezi kwenye Bodi ya Wakurugenzi ya LATRA kwa maamuzi na mapendekezo ambayo yatawasilishwa kwa Mamlaka za Serikali (Wizara ya Ujenzi na Uchukuzi, Wizara ya Fedha na Mipango na Ofisi ya Mwanasheria Mkuu wa Serikali). Baada ya idhini ya Mamlaka za Serikali, nauli zitatangazwa kwenye Gazeti la Serikali.

Mheshimiwa Mgeni Rasmi, yeyote ambaye hataridhishwa na maamuzi ya mdhibiti (LATRA) katika zoezi hili na maamuzi mengine yeyote ya kiudhibiti, atapaswa kuzingatia vifungu vya 26 hadi 28 vya Sheria ya LATRA pamoja na Kanuni za Tozo za LATRA za Mwaka 2020.

Mheshimiwa Mgeni Rasmi, LATRA, inatambua si wadau wote wangeweza kufika hapa leo na kwa kuwa taratibu zinaruhusu kupokea maoni kwa njia ya maandishi, tumeweka utaratibu wa kuendelea kupokea maoni kwa njia ya maandishi katika Ofisi ya Mkurugenzi Mkuu, S.L.P. 3093, Dar es Salaam, iliyopo Jengo la Mamlaka, Barabara ya Nkrumah. Maoni ya wadau kwa njia ya maandishi yatufikie kabla ya **tarehe 31 Agosti, 2022**. Pia, maoni hayo yanaweza wasilishwa kwa baruapepe ya info@latra.go.tz na dg@latra.go.tz

Mheshimiwa Mgeni Rasmi, Baada ya kusema hayo, kwa heshima na taadhima naomba nikukaribishe uongee na hadhara hii, kisha nakuomba utekeleze jukumu kubwa la **kufungua mkutano wa kupokea maoni ya wadau kuhusu viwango vya nauli za treni ya abiria kwa reli ya kati.**

Asanteni kwa kunisikiliza

CPA Habibu J. S. Suluo

Mkurugenzi Mkuu LATRA

19 Agosti, 2022